



(autre exempl.
p. 72)

FACTVM,

POVR LE PROCVREVR GENERAL
du Roy au Grand Conseil, demandeur & accusateur.


*Contre Maistre Michel Charretier Grenetier, Jean Cheualier
Olinier de la Forest Contrerolleurs, Pierre Moré Receueur,
Pierre Cherbonnier Procureur du Roy, Bertrand Billard,
Greffier du grenier à sel de Tours, & Michel Robichon, l'un
des adiudicataires dudit grenier & Contreroolleur provin-
cial des gabelles & greniers à sel de la generalité dudit Tours,
deffendeurs & accusez.*

LES chefs & accusations dont lesdits Officiers
sont atteints & preuenus sont tous cappitaux, &
tels que le moindre merite vne punition exem-
plaire.

Le premier consiste, en diuerfes exactions & cõ-
cussions qu'ils ont faictes & exercées, sur plusieurs marchâs voictu-
rans sel par les destroicts dudit grenier sur la riuere de Loire,
ayans violement faict prendre & enleuer des batteaux, des
vns trois muids de sel, des autres deux muids, & de plusieurs
autres plus ou moins, & iceluy appliqué à leur proffit. Et d'au-
cuns prins de bonnes sommes d'argent.

D'auoir par lesdits Officiers expedie & signé de fauces
certifications, tant du sel deschargé audict grenier, que des
ventes faictes en iceluy: & certifié lesdites descentes & ven-
tes beaucoup moindres qu'elles n'estoient, pour appliquer
le surplus à leur proffit, au preiudice des droicts du Roy, des
Cours souueraines, presidiaux, communautéz des villes, ren-

A



tes & particuliers assignez sur les deniers prouenans de la vente dudit sel.

D'auoir par lesdits Officiers fait de fauces Informations, suborné tesmoins pour simulez naufrages de sel, & s'estre approprié ledit sel au preiudice desdits droicts du Roy & desdits assignez.

D'auoir vendu du sel publiquement en plusieurs parroisses du ressort dudit grenier, contre les prohibitions des Ordonnances. Baillé de faux billets aux acheteurs dudit sel, contenant qu'il leur auoit esté deliuré dedans ledit grenier, pour couvrir leurs malefices, & frustrer le Roy & autres assignez par telles ventes illicites.

D'auoir aussi contre lesdites prohibitions, vendu publiquement du sel en leurs maisons à Tours, & aux champs en leurs mestairies, & appliqué les deniers à leur profit, au preiudice des droicts de sadite Majesté & desdits assignez.

D'auoir par aucuns d'eux, fait pacton avec les faux saulniers, leur auoir tolleré & permis de vendre de faux sel, moyennant certain tribut qu'ils tiroient d'eux: au lieu de leur courir sus, confisquer leur faux sel, & les muléter en grosses amandes pecuniaires & corporelles suiuant les Ordonnances & le deub de leurs charges.

Auoir par lesdits officiers vendu le sel par impost aux parroisses à plus haut prix de beaucoup pour minot qu'il ne se vendoit au grenier. Et à fin d'oster aux habitans desdites parroisses la cognoissance de la valleur dudit sel, n'auoir comme il deuoient (encores qu'il leur eust esté ordonné) voulu tenir en tableau ou par affiche audit grenier suiuant les Ordonnances, les tables des prix dudit sel, comme il se fait aux autres greniers.

Auoir vendu au peuple ledit sel à fauces & foibles mesures, comme appert par les proces verbaux des dernier Decembre 1599. & 3. Ianuier 1600. lesquelles fauces mesures importent au peuple depuis le temps qu'ils sont au grenier, de plus de quarante mil escus.

D'auoir par lesdits Officiers, sous ombre de faire leurs visites, couru les parroisses du ressort dudit grenier, & condamné en grosses amendes la pluspart des habitans: & encores qu'ils iustificassent par breuetz, que de quartier en quartier, & de temps

